

小倉山房詩文集

冊
六

卷之四

四

四

小倉山房外集卷四

錢唐袁枚子才

上尹制府書

六月十四日公鳴入騶過五柳度陞約相鎔壇將葺隨園之蓬茅請鑾駕之臨幸是日也流水游龍冠簪朋盍欲鳴而難轉人含意以未申今聞瓠子防秋繡衣東指凡諸悃素宜早寫宣夫傾陽者葵藿之誠獻曝者野人之禮朱鷺晨飛於漢殿元龜夜夢於宋王樹且爭天雲猶捧日而況新辭墨綬舊綰銀黃一椽皆餽廩之餘五畝亦大官所賜豈有塞門引被不觀河洛之圖洗耳投淵遠拒崆峒之駕者哉然而愛有餘者敬不足也心雖摯者事或乖也夫十匠九柯之說千門萬戶之奇非張華所能詳亦揚雄所未賦猶以清陽玉葉徒高八觚之基銅冒金塗未極九衢之變故駕蒼龍而時邁飛翠蓋以雲翔若覆降清蹕於瓜廬屈重搢於圭竇則天將倚杵奧且生牂金人捧劍而頭低玉女投壺而牕礙必致王商門小雨沾從者之衣叔子笑聞人立胥閭而語掌舍無責庸

之設爰間有穿漏之憂此其不敢者一也說者謂周王德盛蒿可爲宮唐帝心清松生於牖是以

天子書雲蕭寺聽雪靈巖亦復井幹庸庀宋庠彫剝消煬與坎塹不礙嶮瀑與平慘無嫌職此類推則又僨矣夫半椽三瓦得目巧於空青開士苾蒭難引繩夫臣子臨民浣濯戒在公羊密石礪諸載於晉語隨園者考槃適小陋室銘傳比王導之亭臺官非師傅學熊安之洒渫人愧經神張黼辰則木屑難用爲庚牌焚築鬻則草根將嗅於甲帳雖三土爲堯茅茨不翦而重瞳是舜部婁何觀此其不敢者二也倘賜水衡之錢領度支之費亭公栽樹扁長呈材竹入司監風歸令史佻天以爲己力勤民而將自封恐剡溪立舍戴逵不安楊烈賜橋阿稱薄福果五丈旗復道周廬之所高樹方明豈十七步長阿連石之鄉可賚處士此其不敢者三也若令自修越時私貢吳雲庀此匏居媚於朵殿恐身少清宮之費家無潤屋之資九仞臺高難趨子午三成土小敢號昆侖徒使孟室見尤趙椽被誚薦艾之五旬有愆射稽之四板空謳此其不敢者四也夫黃籍白

籍各有都家區士區廬豈容墟戾枚離禹航之地叩鍾山之英忘首邱之思冒
寄公之號本非土斷難告僕夫雖孔愉在郡卽會稽以爲家廬庶居官愛靈昌
而不返稱周非客受廬皆民然而清問忽下於九乾巧宦有同乎三窟此其不
敢者五也昔舂陵沛邑之幸本是雲龍槐眉刀壁之觀無非仙跡卽或宴戴公
之山下訪杜相於樊川大抵警蹕清塵早張旒艾未必天豚暮鸛許直東廂今
者沐鶴溪深母妻俱在桃源花老雞犬相將避則靈瑣誰司留則重櫺難伏豈
挹婁有九梯之穴廣陵非六慎之門乎且夫尊無二上齒路馬者有誅席設九
重過公廬者必式苟降羲軒之鑾輅將見堯舜於羹牆剌棘曾枝都成皇樹衆
歸窮瀆盡是帝邱紅杏進而黃紬封御香留而左扉闔空抱李崧之宅券將寄
息夫之邱亭此其不敢者六也且夫四千償樹十萬買鄰洗薤同渠灌花相助
鑿壁分一燈之火綠楊爲兩家之春久已洽彼比鄰無人笑拙矣倘復路布甬
道門開劇驂剝小人之廬弛文子之室伐東鄰之棗樹移南家之輓工則燕雀
驚棲將歸咎於連牆之士池魚波及兼抱慚於乞火之家未增景於邊撩先樹

怨於襟背此其不敢者七也抑又聞之鳬渚鶴洲以小爲貴雲巢瑞室惟曲斯
幽倘加將作之經營定用考工之儀式九蓋皆繼四維盡參樹翦賓連衢加璧
械旣鎮其薨損一壑一邱之致將懸以塾改半郊半郭之風必使地上布金池
中鋪錦藻兼睨目玉帶呈圖有莊嚴界觀無濠濮間想此其不敢者八也或謂
捨家奉佛明僧紹且結緣焉以宅易州武陵王或僥倖焉又何妨借終南之捷
徑獻白雁爲司城乎不知枚刺草心殷籀雲力薄帶淵牆而後起身若斷菑冠
蓬累以嫫嫫形同欺賴倘芰荷衣冷見日先焦竹笏風輕朝天便墜翻使蜘蛛
讓隱牕雞止談山且移文松將變色是以抽蒲筆寫蓬心獻邱里之言當華陽
之表柱州刑馬願迎三皇之車谷口寒門冀免萬靈之接公謀參嘖室職任咎
單畜君何尤愛人以德留蕭閒之草木卽錫福於烟霞不奪箕山未必堯階之
路窄許扃石戶彌彰禹甸之風清

答王厚齋書

昔者由余入秦弭節西極樂毅遊燕稅車金臺之二子者豈忍棄其鄉哉誠狂

於名而憂夫世也別後猗膏棘軸衡流方羊耀靈促輪蟾目瞪轡馳原隰之繡錯睇巒巘之蘄絕凡海王所以尊地媪所以富玉節所以走晉金椎所以馳秦亦旣覲止低徊留之方知刑馬之郊有古皇之跡負黍之壤果隱士之居古人文藻必資遊覽倘爲鄙儒終慚都士僕學非賈誼乃蒙吳公之薦才劣孫宏竟對明廷之策猶不自諒以爲庶幾排金門進紫闥彈庖犧之八索調朱襄之五絃矣爾乃強臺未上弱水遽沉知北有懷圖南無力側身徒赤壤局影非朱門梧邱哭而仲尼之車不停范蠡吠而文種之旌不至我獨何能無慨然已而遇薦主金公之憂卷舌望星若盧握手或奉壺冰或操量鼓待其事竟然後拂衣寧可使兩箭貫耳讓禮震以前驅萬戟义胸救范升而早退哉僕聞亭歷萎於炎夏款冬華於嚴霜窮通之靡定也呂尚使老者奮項橐使童兒矜遲速之無常也粵苑之天難卜侯龜之兆高墉之地終占射隼之功故匡衡對策不中經義益明蘇秦捭闔無功飛鉗始學僕雖摧折亦無瞞焉佁愁自苦櫟樗獨前模繡範其身蘭滄謹其湛庶幾再奮溟池重亨天衢非觀書於太史亦聽役於司

徒耳若夫辭君王而爲鮑焦之遁衣敝袴而爲買臣之歸則擲楮無所題橋有
志歸宋見靳用趙何益揆厥下情實非所願方今木葉臥地天風隕霜候雁宵
征秋河曉碧先生蒸馮珧之膏飫宵梁之酒折招搖之桂召狂屈之徒唱古寡
應呼今誰聽坐無車公知必不爲樂也嗟乎朱絲未染猶隕楊朱之涕白髮嚙
指時動曾參之懷況復心旌風搖芳訊兩絕悶巾褐於旅巷生絳謳於斥苦涸
魚噓沫而後知同池之懽越禽孤棲而後知離羣之哀夙欽德音辱贈敢答削
札局函悵然何已

與蔣苕生書

昔柯亭之竹非呈響於蔡邕鹿盧之劍豈矜奇於秦女乃過之者駐轡佩之者
超屏何哉美見者情生氣求者聲應人非矇眴覩夷光而運眸地非龔俗奏咸
韶而傾耳此鄭風所以歌緇衣周易所以稱蘭臭也若乃惠施測交而無從屈
平獨立而增歎游魚欲出而瑟希雍門思悲而琴寡無所感之誰爲應之客歲
稅駕廣陵見足下壁上詩烟墨猶溼素塵將掩僕手拂口吟色然心駭絃歌應

節流水可以移情同堂異鄉停雲因而增慨字尾書荅生二字嘻江上丈人澤
邊漁父伊可懷也彼何人哉僕雖識高敏夢中之路難抱張騫鑿空之想縱有
宜生切肺之義更深孺悲無介之虞於是殫深心於搜牢極沖襟於遐訪西朝
執訊虛位以待李巡東海得書榜道而求孫惠愛而不見於今三年幸安亭公
子紆轡白下道足下居洪都之地爲舍人之官其才藻耀其人玉立然後知足
下國之良也民之秀也欽遲者方望若歲而馳譽者久癩若雷雖然九州大矣
人才衆矣僕蠖伏江表足下鳳鳴神都僕知君君寧知僕哉豈意銅山之鐘地
隔而霜應晨風之鳥樹遠而聲交邴原渡海方覓孫崧北海有心早知劉備於
是遠蒙矜寵重寄篇什開函香生凌紙怪發驪龍未遇先投六寸之明珠師曠
方驚更轉九天之清角識麟一趾眸子自矜藏鳳半毛門庭可賀所冀足下北
行之日鳴騶臨汎僕冀除敝廬請吾子之須臾焉昔者嵇康命駕千里相思元
度出都一日九詣心期旣重手握自殷緬彼賢流亶其然矣足下與余豈在古
人之後乎

與延綏將軍書

枚聞遭逢者運也經略者才也蛟龍乘三春而起螫虎豹臨九關而威生齊有黔夫燕人祭北門之鬼趙有李牧秦王罷東并之勢林父獲鄴舒於北狄萊子朝晏弱於東陽莫不乘風雲耀金石隱敵國於壘外鞏金湯兮千里若夫攬九邊之控制論八鎮之規模防秋以全陝爲尊入關以延綏爲要產非西極不號龍駒人過陰山都名壯士角聲宵奏延陀之妖雪驚飛檄草朝成西毒之黃龍氣盡此則河湟惟唐休璟能知而安西非郭代公不可者矣卓園將軍浙西八俊河鼓一星戴豹皮之冠纏虎尾於臂堯廟蹋壁橫行十尋齊市長繩曳馳三丈天生躍穿苦竹刺而如飛黃回運刀激水灑而不入爲賊習膽騎牛讀書故能拔身銀槍起家金穴蛇矛丈人擒青犢以立功浴鐵三千鎮白門而擁節子陵臺畔來侯霸之車聲杜甫柴門寬嚴公之禮數容長孺爲揖客喜韋叡是同鄉甲戌春二月朝

天子於京師日乍捧而雲開壺未投而天笑舞羊侃之槩樹折苑中擊周寶之

毬勇聞殿上遂製梁公之金字賜萬徹以膜皮一障乘邊雙旌出塞倥侗人武
試亞夫之治兵青海天驕服高皇之善將此行也東門介士南國儒冠老者頗
鳴少者齒擊莫不指陣圖而思丞相攀大樹以望將軍僕獨不然蓋有說矣夫
虎飛食肉之奇豹死留皮之語尙屬武夫之佼佼難語大雅之悵悵惟念我

國家休養百年欽明四代南至於濮鉛北至於祝栗西至於肅靡東至於闕梧
莫不候月歸琛占風納贐惟西戎一旅屢折箠答小醜尙存英雄爲之氣湧匈
奴未滅男兒何以家爲公之聞鐘壯心投袂欲起也久矣今者旄頭夜落神雀
朝飛單于生內亂之憂可汗有尊天之請旗書歸順烏願投明貢牛羊稱唐帝
之畜生獻燕支作漢宮之顏色而且雕庫來告國難康居願作先驅 天子哀
彼氈裘受其楛矢恢張黃籍編隸烏丸愛虞詡之議涼州常通右臂薄僧孺之
拒悉怛坐失生羌將撤戍己之邊防增庚戌之土斷置燭龍之州邑懷闡茸之
人民蓋渭橋謁而麟閣畫十一將高昌滅而北方靖三十年誠綏邊之盛事柔
遠之鴻業也所慮者其來荒忽非八柄所可維婁其義羈縻非九刑所能震擣

是以不樂水土則頡利思歸略失機宜則梁安中變贊普獻塞終持銀鵠而奔
梨樹請盟竟鑄金枷以待羈留質子彼何愛於匹夫安設屯田或且鞠爲奧草
雖依漢與依天等而受降如受敵然矧孟珙之室萬間班超之國五十豈無能
稱操刺賢號屠耆者勢必滿月生心推寅起事等夜龍之射闕學萇叔之違天
我已垂橐彼方鳴鏑階將舞羽寇且張弧夫西域何足敵漢而平準卒以成書
南蠻未必困唐而徐州因之盜甲然則魏徵憂國之謀江統徙戎之論誰關鐵
牡永靖銅駝非所能知也不敢不告也延綏北可控五戎南可衛三輔有蘆門
塞砦之險有清邊三族之戍願公消禍於無形練兵於不戰先知爲哲見小曰
明鄧訓馭燒當恩如父子高車畏陸侯嚴若風霜庶幾廷光拜城上而肅然梅
錄識豐州而不動此策之上者也不然則六耦開弓三鑿起戒嫖姚之兵五道
孫武之智九天焚老上之龍庭掃淳維之甌脫必使頭飛六角面縛三門服匿
廬空珍珠帳捲然後鑄碑葱嶺挂弓扶桑乃爲大丈夫之志業耳昔者刑塘之
地動文命之威桐鼓之歌殺空桑而作將軍其有意乎然而教民七年先甲三

日避險尙遠趨時貴近銅柱蒿牆都煩竿畫琵琶蹴踘盡是兵機或未至金城
先圖方略或經營玉壘不設墮門慮撓事而內結中涓選精仗而自臨武庫緩
帶之時畫虎尾舂冰之館援枹之際有銀衡鐵室之防此又豪傑之著龜忠臣
之葆就蓋謀高然後陣定主信然後權專功雖成於臨時道當裕於平日也僕
身別熊羆心依鹿豕蒼鷹當秋而先倦老馬聞戰而不哮至於繹歸義之三章
唱婆駝之數疊饒歌頌漢江漢美周則力有餘妍心無他讓早染毫素勒待燕
然之銘若作馬曹請設舊交之位

與雨林似村兩公子書

昔東阿采庶子之春華廬陵愛延之之淺薄郭家駙馬贈錦繡於李端蕭氏畫
堂寫丹青於到溉非關公子定愛才人從古青琴最憐同調我望山宮保仗節
觀河折筭訓子孝綽門內能詩者七十二人崔約書中手抄者八千餘紙丹山
氣厚雛鳳爭飛湘水波清叢蘭並茂一招隱者三宿南牙恭逢雨林似村兩公
子車蓋初傾網馮並坐當恢台之孟夏均貴賤於條風珠耀雙丸難分甲乙玉

森兩樹共倚蒹葭與祖約談次日如失眠之客聽裴綽語終宵聞彈瑟之聲天
士去而地士來世儒倦而文儒繼寫長瑜之佳句則手界烏絲看太叔之彎弓
則箭穿楊葉可以測交可以樹善又豈止梨名釘坐酒號蘭生極郎主之懽情
夸雅遊之盛事也乎亡何鳬飛緱氏鶴去遼城叮嚀縞紵之投惆悵河梁之別
嗟乎鳥猶擇木人貴知心碌碌毛生慕平原君之高義悵悵丁牧事東平王而
不歸僕豈忘情遽吟別賦哉所柰惟士無田小人有母桃花源好非漁父之家
庭桂樹山空剩淮王之雞犬松風耳冷聽官鼓以驚喧蘿薜衣涼對簪纓而覺
野倘復棲遲幕府眷戀龍門不爲百里之侯轉作將軍之客是失魯而以千社
爲臣辭卿而以萬鍾受祿有乖出處無解蚩儔是以唾井情深耕煙願切團雪
散雪歌申叔之離詞大山小山別何家之兄弟願言指水深表僕心未得銜泥
長巢君屋繩牀一挂知來者之人稀雲水千重恐夢中之路斷幸而紫羅香在
雜佩聲留何處雪泥不印飛鴻之爪有時烏鵲能通銀漢之津翠被鄂君歡難
抗手黃衣慶忌呼可傳書明年菴水蓮開尙想同舟於王子他日郎君官貴莫

施行馬於門前

上台觀察書

枚聞夏后上三嬪而得九辨板板非上帝之心周官操六計以馭羣才休休乃用人之道是以情在理先聖人且以爲田矣瑜不瑕掩良工乃以觀玉矣枚赤緊濫膺丙丁趨走深慮萊蕪不能關絲灼不能清悼毫不能仁強宗不能拔故前者三肅崇階五內震動恐諸葛垂問何祇之吏事不修曹公共談子揚之精神未蕲不意明公寬負子之責入飛耳之談怒枚剔騶歌郎抵觸金布枚始而驚繼而喜驚者驚公於東方未明之時容光必照喜者喜枚於國風好色之外餘罪無他不敢抵攔不求道地但願陳其悃懷請一考之詩書昔李西平郡將也而營妓自隨白太傅司馬也而商婦度曲頗踰規矩難律官箴乃其人皆功在山河名香竹素枚自泣官以來未嘗一刻忘簡書不肯一言枉訊刺待至五花判畢四郊雨甘乃敢彈箏酒歌倚裳月坐愛鄂君而流連翠被賦洛神而惆悵驚鴻事有甚於畫眉盜非同於掩耳蓋以爲靖節閒情何瑕白璧東山女妓

卽是蒼生連牴無傷小德出入可耳不圖閣內之悍妻見赦閣中之妬妾包容而轉蒙大府搜牢長官狙伺嘻過矣夫采蘭贈芍不見削於宣尼閉閣尊經翻自附於新莽余中請禁探花而以賊敗傅元善言兒女而以直聞張翰有小史之詩高風嶽峻盧杞無侍兒之奉醜迹風馳杲卿忠臣徵求花粉輔國逆豎靜學沙門古來君子之非賢於小人之是布在方策僂指難陳枚所仰止高山恥居下流者蓋有在矣然明公必以兩廡相期一流見待謂破老亦傷盛德贅姪何以齋心則枚雖不迷復於此時亦必味回於他日若徒鋪張令甲震耀風聞捨簿領而詬陰私談牀第以爲恫喝則蕭何律上不禁笙歌宓子堂前豈無琴瑟而況李元忠不以飲酒易僕射徐騎省肯以歌曲換中書人孰無情士各有志黃鵠舉矣青天廓然丈夫溺死何妨而拘游哉公幸毋以尋約之繩困奇佞之士也

慰蔣用菴侍御失火書

公子來接手書知先生名山副墨已爲六丁所收北闕巾車更爲五酉所尼嘻

其酷矣僕不獲執鐸將擷作公孫之侍又不能反風噴水表郭憲之心敬以殘
客之卮言博達人之莞爾蓋聞火也者於水爲妃無平不陂在夏爲孝其危乃
光是以梁燬浮圖武帝以爲道高魔盛魯焚宣榭何休以爲黜杞新周老物晉
存燈常青而不滅霸圖吳就壁雖赤以何妨王敬則捧紗帽以呼事須及熱韓
安國對田甲而笑灰寧不然先生以霜後之松筠作焚餘之圭璧紅羊劫小白
撰家空幸草雖存勞薪已盡未免蕭邱性冷炎上心孤然而浹日而遇七十二
毒者神農之嘗草也鑄財而燒三十六爐者冥司之懺除也造化阨人必極之
於旣往相風測景當覘乎其將元冥祝融時相爲帝桃笙葵扇事豈有常子
梱被賣於渠公乘車食肉墨子跌蹠於楚國錦衣吹笙海三凍於慕容之朝山
一飛於身毒之國動將靜轉晦與明通舂蠶之機由來久矣而況火原號聖烟
亦稱祥井絜郊天庭燎華國管氏被燿而作相衛侯名燬以興邦豈非鼎彰調
燮之功離本文明之象哉先生內學七緯旁通三微千樹逞能五神開教清談
而熒惑退舍鑄詞則蛟龍捧爐謝元之度屐安櫟必教得所諸葛之藩籬亭障